



**Los ntawm Thawj Tswj
Hwm Dieter F. Uchtdorf**
Tus Pab Cuam thib Ob hauv
Thawj Pawg Thawj Tswj Hwm

Vajtsww Ib txoj Hauj Lwm Loj

Plaub Hlis Ntuj 6, 1830

Ib puas yim caum xyoo dhau los lawm, Yauxej Xamiv, Oliver Cowdery, thiab ob peb tug neeg tau los sib sau ua ke los txhim tsa Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg. Raws li tej ntaub ntawv uas tau sau tseg mas lub rooj sab laj no yooj yim heev tab sis sawv daws yeej hnov tau tus ntsuj plig hauv lub rooj sab laj. Yauxej tau sau tseg tias tom qab noj lub cim nco txog, “tusVaj Ntsuj Plig Dawb Huv tau ncuav nplua mias los rau peb—ib txhia neeg qhia txog tej yam uas yuav muaj los yav tom ntej, ho peb sawv daws puav leej qhuas tus Tswv, thiab zoo siab hom khaj.”¹

Tej yam uas tau muaj rau hnub ntawd lub ntiaj teb yeej tsis paub txog li; tsis muaj leej twg tuaj pom es yuav muab sau tseg rau hauv tej ntaub ntawv xov xwm li. Txawm yog li ntawd los, tej ntuj ceeb tsheej yeej zoo siab heev thiab muab yeeb koob rau Vajtsww—rau qhov hnub ntawd, lub Koom Txoos ntawm Yexus Khetos tau rov qab los nyob hauv ntiaj teb lawm!

Solomon Chamberlain

Hnub ntawd los txog rau hnub no, muaj kev ntseeg ntau heev-los rau cov tus tub thiab cov ntxhais ntawm Leej Txiv Saum Ntuj Ceeb Tsheej ces ua rau lawv tau

ua raws li tej kev tshooj siab ntawm tus Vaj Ntsuj Plig Dawb Huv ces los ua kev cai raus dej. Ib tug neeg zoo li no yog Solomon Chamberlain.

Solomon yog ib tug neeg uas hnov tau tus ntsuj plig thiab nws tau siv sij hawm ntau teev thov Vajtsww, thov kom tau kev zam txim rau nws tej kev txhaum thiab tajj thov Leej Txiv Saum Ntuj Ceeb Tsheej kom qhia qhov tseeb rau nws. Muaj ib lub sij hawm thaum xyoo 1816, Solomon ua yog toog hnov lo lus cog tseg hais tias nws yuav ua neej nyob txog hnub uas Yexus Khetos lub Koom Txoos yuav rov qab txhim tsa raws li tus txheej txheej tub txib yav thaud dua ib zaug ntxiv hauv lub ntiaj teb no.

Ntau xyoo tom qab ntawd Solomon caij nkoj yuav mus pem lub teb chaws Canada thaum lub nkoj txawm nres rau ntawm ib lub me nyuam zos hu ua Palmyra, New York. Solomon txawm xav hauv nruab siab tias nws yuav tsum tawm ntawm lub nkoj mus. Nws twb tsis paub yog vim li cas nws ho tuaj txog lub zos no, ces nws pib nrog cov neeg hauv lub zos ntawd tham. Tsis ntev, nws txawm hnov lawv cav txog ib phau “ntawv Vaj Lug Kub Kub.” Nws hais tias cov lus ntawd txawm ua rau nws hnov tau “ib lub hwj chim yam li fais fab tom uas muaj txij ntawm nws lub ncov taub hau los mus rau nws cov ntiv taw.”

Nws noog noog mus txog nws nrhiav tau tsev neeg Smith lub tsev, es nyob ntawd nws nrog lawv tsev neeg sib tham txog tej xov xwm zoo kawg nkaus ntawm txoj moo zoo uas txum tim rov qab los lawm. Tom qab uas nws siv li ob hnuv nyob ntawd, Solomon txawm rov qab taug kev mus pem Canada, es nqa nrog nws 64 daim nplooj ntawv ntawm Phau Ntawv Maumoos uas nyuam qhuav luam tawm tiam sis tsis tau muab khi ua ke li phau ntawv tiag. Nws mus txog qhov twg los nws qhia cov neeg, “txawm yog cov siab cov qis, cov muaj los cov pluag, . . . kom npaj rau Vajtsv txoj hauj lwm loj uas tab tom yuav tawm tuaj.”²

Vajtsv Ib txoj Hauj Lwm Loj

Txij thaum hnuv ntawd thaum lub Plaub Hlis Ntuj xyoo 1830, ob peb puas vam leej neeg nrhiav tau qhov tseeb ntawm txoj moo zoo uas txum tim rov qab los thiab tau los ua kev cai raus dej. Kuv ua tim khawv hais tias “Vajtsv txoj hauj lwm loj” no nyob hauv lub ntiaj teb niaj hnuv nim no tiag. Kuv ua tim khawv tias tus Tswv saib xyuas Nws lub Koom Txoos thiab coj Nws lub Koom Txoos dhau ntawm Nws tus yaj saub, President Thomas S. Monson. Tsis yog ib txoj koob hmoov thas mas das xwb uas peb ua neej nyob hauv lub caij nyoog kawg no. Lub caij nyoog no zoo kawg nkaus, uas yog ib lub caij uas cov yaj saub yav thaud tau pom thiab uas cov tim tswv saum ntuj saib xyuas thiab txhawb nqa zoo. Tus Tswv txawj xav txog Nws lub Koom Txoos. Nws kuj txawj xav txog lawv cov uas, ib yam li Solomon Chamberlain, mloog saib tus Vaj Ntsuj Plig Dawb Huv tshoov lawv lub siab los mus ua dab tsi thiab nrog lawv cov kwv tij nus muag thoob plaws lub ntiaj teb no pab coj Vajtsv txoj hauj lwm loj no tawm tuaj rau sawv daws tau pom.

LUS CIM

1. Yauxej Xamiv, hauv *History of the Church*, 1:78.
2. “A Short Sketch of the Life of Solomon Chamberlain,” ua ntawv ntaus tawm, Church History Library (nyob hauv qhov Internet rau ntawm www.boap.org/LDS/Early-Saints/SChamberlain.html); kuj saib William G. Hartley, “Every Member Was a Missionary,” *Ensign*, Sept. 1978, 23. Ob peb hnuv tom qab nws tau txhim tsa lub Koom Txoos, Yauxej Xamiv tau muab Solomon Chamberlain ua kev cai raus dej hauv lub pas dej Seneca Lake, New York.

QHIA LOS NTAWM TSAB XOV XWM NO

“**Q**hov uas peb ua yam ntxwv rau lwm tus neeg ua raws yog ib yam zoo uas yuav pab peb qhia lwm tus neeg” (*Teaching, No Greater Call* [1999], 18). Thaum koj qhia zaj dab neeg hais txog Solomon Chamberlain, caw tsev neeg ua tib zoo mloog saib Solomon ua raws li tus Ntsuj Plig tshoov nws lub siab pes tsawg zaus. Sib tham saib nws tus yam ntxwv ua li ntawd yuav pab tau lwm tus neeg li cas. Caw tsev neeg qhia txog ib lub sij hawm uas ib tug neeg tus yam ntxwv zoo tau pab lawv.

COV HLUAS

Kuv txoj Kev Sim Kev Ntseeg

Los ntawm Jason Young

Thaum kuv muaj 13 xyoos, kuv pib nyeem Phau Ntawv Maumoos txhua hnuv, thiab kuv txawm tau koob hmoov txhua hnuv txij thaum ntawd los.

Peb hoob Kawm Vaj Lug Kub puav leej muaj 13 xyoos xwb thiab peb tsis tshua coj tswm seeb li. Txawm yog li ntawd los, peb muaj ib tug kws qhia zoo kawg uas rau rau siab qhia txhua zaj lus qhia dhau ntawm tus Ntsuj Plig tej kev tshoov siab. Muaj ib zaug, nws qhia peb txog txoj kev nyeem cov vaj lug kub.

Thaum kuv tus kws qhia xaus zaj lus qhia ntawd, nws yaum twv kom peb txhua tus ua ib yam dab tsi. Txawm hais tias nws hais rau peb txhua tus los, nws ntsia ntsoov kuv thaum nws hais tias, “Kuv yaum kom koj nyeem hauv Phau Ntawv Maumoos txhua txhua hnuv!” Kuv xav zoj rau kuv tus kheej tias, “Kuv mam li qhia koj. Kuv mam li ua li ntawd!”

Kuv pib nyeem 1 Nifais tshooj 1 hmo ntawd kiag thiab kuv rau rau siab nyeem vaj lug kub txhua txhua hnuv. Tej zaum thaum kuv nyuam qhuav pib kuv tus nib xaim tsis tshua zoo, tiam sis nyob nyob kuv pib nyiam qhov uas thaum kuv nyeem Phau Ntawv Maumoos kuv nyob kaj siab lug. Qhov uas kuv nyeem txhua hmo yog ib yam uas kuv nyiam tiag.

Ob peb hlis tom qab ntawd kuv txawm nyeem Amas 32 thiab nyiam lub tswv yim hais txog txoj kev sim kev

ntseeg. Nyob tom tsev kawm ntawv peb nyuam qhuav tau kawm txog tej kev kawm txuj ci dhau ntawm kev tshawb xyuas thiab kev sim, ces kuv txawm txhos caug thiab qhia Leej Txiv Saum Ntuj Ceeb Tsheej hais tias kuv yuav pib sim kev ntseeg li hais ntawd. Kuv thov kom kuv thiaj yuav paub tau hais tias Phau Ntawv Maumoos muaj tseeb tiag.

Rov qab saib tej yam uas tau muaj los rau kuv, kuv paub hais tias Leej Txiv Saum Ntuj Ceeb Tsheej tau teb kuv cov lus thov Vajtsww ntau zaus. Qhov uas kuv nyeem Phau Ntawv Maumoos txhua hnuv tau ntxiv dag zog rau kuv kom thiaj kov yeej tau kev phem kev qias. Kuv txawm nyob ze dua kuv Leej Txiv Saum Ntuj Ceeb Tsheej. Kuv tau txais lub hwj chim ntawm tus Vaj Ntsuj Plig Dawb Huv kom thiaj kov yeej tau tej kev cov nyom uas tav kuv kev. Qhov uas Amas hais hais txog kev sim Vajtsww txoj lus muaj tseeb tiag: “Nws pib ua rau kuv tus ntsuj plig loj tuaj; muaj tseeb tiag, nws tau pib ua rau kuv to taub tuaj, muaj tseeb tiag, nws tau pib qab heev rau kuv” (Amas 32:28).

ME NYUAM YAUS

Tsis Yog Ib txoj Koob Hmoov Thas Mas Das

Lub Koom Txoos raug txhim tsa 180 xyoo dhau los lub hli no. Thawj Tswj Hwm Dieter F. Uchtdorf hais tias “tsis yog ib txoj koob hmoov thas mas das” uas peb ua neej nyob niaj hnuv nim no, thaum lub Koom Txoos twb txum tim rov qab los lawm. Kom thiaj nrhiav tau ob peb txoj koob hmoov loj kawg uas Leej Txiv Saum Ntuj Ceeb Tsheej muab pub rau cov neeg dhau ntawm lub Koom Txoos, cia li nrhiav hauv cov vaj lug kub nram qab no.

Cov Tub Txib 22:16

2 Nifais 32:5

Yakaunpau 5:14–15

D&C 20:8–12

Amauj 3:7

D&C 110:7–10

Kev Nrhiav thiab Kev Txais Kev Tshwm Sim rau Yus tus Kheej



*Ua tib zoo thov
Vajtswv saib yuav
qhia txog tej vaj lug
kub thiab tej kab lus
twg los sis, yog hais tias toob kas
no siv lwm txoj ntsiab cai uas yuav
foom tau koob hmoov rau cov viv
ncaus uas koj mus ntsib. Hais lus
tim khawv txog zaj lus qhuab qhia.
Caw kom cov uas koj qhia ntawd
piav saib lawv xav li cas thiab
kawm tau dab tsi.*

Kuv Yuav Ua Li Cas Nrhiav Tau Kev Tshwm Sim rau Kuv tus Kheej?

“Peb npaj txais kev tshwm sim rau peb tus kheej ib yam li cov yaj saub npaj txais, dhau ntawm kev kawm vaj lug kub, kev yoo mov, kev thov Vajtswv, thiab kev ntxiv dag zog rau peb txoj kev ntseeg. Kev muaj siab ntseeg yog qhov tseem ceeb tshaj plaws. Nco qab ntsoov hais Yauxej tej kev npaj rau Thawj Qhov Ua Yog Toog Pom:

“Yog nej cov leej twg tsis muaj tswv yim, nej cia li thov Vajtswv. . . .

“Tiam sis thaum nej thov nej yuav tsum cia siab hais tias, Vajtswv yuav pub yam uas nej thov rau nej xwb xwb.”¹

Txwj Laug Robert D. Hales ntawm Pawg Kaum Ob tug Thwj Tim.

“Kev thov Vajtswv yog *koj* tus yawm sij uas qhib tau rooj ntug. Lub

ntsuas phoo nyob rau ntawm daim ntaub thaiv sab uas koj nyob xwb.

“Tsis tas li ntawd xwb. Rau ib tug neeg uas xav hais tias kev tshwm sim yuav ntwv los xwb tsis tas ua hauj lwm dab tsi, tus Tswv hais tias:

“Koj tsis to taub zoo; koj xav hais tias kuv yuav muab pub rau koj xwb, es koj twb tsis ua tib zoo xav mus xav los zoo tso koj mam noog kuv.

“Tiam sis, saib seb, kuv hais rau koj, hais tias koj yuav tsum ua tib zoo xav mus xav los hauv koj *lub paj hlwb*; ces koj yuav tsum noog kuv saib puas yog, thiab yog tias qhov ntawd yog lawm, kuv yuav ua rau koj lub hauv siab sov siab so; yog li ntawd koj yuav *hnov tau* hais tias qhov ntawd yog lawm.”²

Thawj Tswj Hwm Boyd K. Packer, Thawj Tswj Hwm ntawm Pawg Kaum Ob tug Thwj Tim.

Kuv Yuav Ua Li Cas Txais Tau Kev Tshwm Sim rau Kuv tus Kheej?

“Raws li ib txwm muaj los feem ntau, kev tshwm sim los yog kev tshoov siab los rau peb dhau ntawm cov lus los yog cov kev xav uas tshwm los hauv lub paj hlwb (saib Enauj 1:10; D&C 8:2–3), dhau ntawm kev nyob kaj siab lug (see D&C 6:14–15), dhau ntawm kev pom zoo los yog tsis pom zoo rau tej yam uas yus xav tias yuav ua, los

TEJ KEV PAB RAU KEV MUS SAIB XYUAS TOM TSEV

Ua ib tug mus saib xyuas tom tsev, koj txais tau tej kev tshoov siab los ntawm tus Ntsuj Plig hais txog koj cov viv ncaus tej kev xav thiab saib koj yuav tsum ua li cas kom thiaj pab tau lawv. Thaum koj qhia zaj lus qhia no, raws li qhov uas tsim nyog, qhia txog tej kev tshoov siab los yog tej kev pab twg uas koj tau txais hais txog kev mus saib xyuas tom tsev.

KEV NPAJ YUS TUS KHEEJ

- 1 Xamuyees 3:10
- 1 Vaj Ntxwv 19:11–12
- Amas 5:46; 26:22
- 3 Nifais 19:19–23
- D&C 8:2–3; 9:8–9; 88:63–64

yog dhau ntawm tej kev ua yeeb yam uas tshoov peb lub siab. Ib yam li Thawj Tswj Hwm Boyd K. Packer, . . . Thawj Tswj Hwm ntawm Pawg Kaum Ob tug Thwj Tim tau hais tias, ‘Kev tshoov siab los rau peb ua ib qho uas peb hnov tau hauv nruab siab ntau dua ib qho uas peb hnov tau ntawm pob ntseg.’³

Txwj Laug Dallin H. Oaks ntawm Pawg Kaum Ob tug Thwj Tim.

“Lub tuam tsev yog ib lub tsev kawm ntau yam. Cov kev qhia

hauv lub tuam tsev feem ntau yog ntaus cim rau lwm lub tswv yim thiab yog ib yam uas peb kawm tau dhau ntawm tus Ntsuj Plig xwb. Qhov no txhais tau hais tias yog lub ntuj qhuab qhia peb. . . . Qhov uas peb to taub saib tej kab ke thiab tej kev khi lus txhais li cas yuav loj hlob tuaj thaum peb rov qab mus tom lub tuam tsev ntau thaum peb koj cwj pwm muaj ib

lub siab xav kawm thiab xav txog tej qhov tseeb nyob mus ib txhis uas lawv qhia. . . . Cia peb zoo siab txais lub dag zog ntawm sab ntsuj plig thiab qhov kev tshwm sim uas peb txais tau thaum peb mus tom lub tuam tsev ntshawv ntshis.”⁴

Silvia H. Allred, tus pab cuam thib ib hauv pawg tuam thawj tswj hwm ntawm lub Koom Haum Niam Tsev.

LUS CIM

1. “Personal Revelation: The Teachings and Examples of the Prophets,” *Liahona*, Kaum Ib Hlis Ntuj 2007, 88.
2. “Personal Revelation: The Gift, the Test, and the Promise,” *Ensign*, Kaum Ib Hlis Ntuj 1994, 59–60.
3. “Eight Reasons for Revelation,” *Liahona*, Cuaj Hlis Ntuj 2004, 8.
4. “Holy Temples, Sacred Covenants,” *Liahona*, Kaum Ib Hlis Ntuj 2008, 113, 114.

© 2010 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam ua lus As Kiv: 6/09. Pub txhais ua lus Hmoob: 6/09. Kev txhais *Visiting Teaching Message*, April 2010. Hmong. 09364 295